

**Kalaallit Nunaanni inuussutissarsiummik
ingerlataqarneq pillugu Inatsisartut inatsisaata
allanngortinneqarneranik Inatsisartut inatsisaat
(Kalaallit Nunaanni Inuussutissarsiutinik
Nalunaarsuiffimmi ingerlatseqatigiiffiit
nalunaarsorneqartussaataanerat takornarianillu
tikittoqarneranut il.il. atatillugu nioqquteqarfiup
aalaakkaasup avataani nioqquteqartarneq pillugu
maleruagassanik aalajangersaanissamut
piginnaatitaaneq)**

§ 1

Kalaallit Nunaanni inuussutissarsiummik ingerlataqarneq pillugu Inatsisartut inatsisaanni nr. 12, 12. november 2001-imeersumi makku allannguutigittinneqassapput:

1. § 5, imm. 1, nr. 1 ima oqaasertalerneqassaaq:

"1) Erhvervs- og Selskabsstyrelsemi Kalaallit Nunaanni angerlarsimaffeqartumi nalunaarsorneqarsimagunik Kalaallillu Nunaanni Inuussutissarsiutinik Nalunaarsuiffimmut nalunaarutigineqarsimagunik,"

2. § 5, imm. 2, ima oqaasertalerneqassaaq:

"Imm. 2. Ingerlatseqatigiiffik pilersinneqarnermi nalaaniippat, imm. 1-imi aalajangersakkat apeqqutaatinnagit Erhvervs- og Selskabsstyrelsimut Kalaallillu Nunaanni Inuussutissarsiutinik Nalunaarsuiffimmut nalunaarutigineqarsimaguni suliffimmik ingerlatsisinnaavoq nalunaarsorneqarnissami tungaanut."

3. § 5, imm. 3 oqaaseqatigiit aappaattut ilanngunneqassaaq:

"Ingerlatseqatigiiffiup Kalaallit Nunaanni Inuussutissarsiutinik Nalunaarsuiffimmut nalunaarutigineqarsimanissaa ilanngulluguttaaq piumasaqaataavoq."

4. § 5, imm. 4-mi oqaaseqatigiit sisamaattut ilanngunneqassaaq:

"Immikkoortortat Kalaallit Nunaanni inuussutissarsiummik ingerlatsisinnaassagunik Kalaallit Nunaanni Inuussutissarsiutinik Nalunaarsuiffimmut nalunaarutigineqarsimassapput."

5. § 11 imm. 1, ima oqaasertalerneqassaaq:

"§ 11. § 12-imi oqaatigineqartutut pisut avataanni inuussutissarsiummik ingerlatsinissamut piumasaqaatit

eqquutinneqarsimanngikkaluarpataluunniit nioqquteqarfiup aalaakkaasup avataani pajuttornikkut, qamutinit uniartakkanit, qamutinit pajuttuutinit, tupernit allatulluunniit utaqqiisaasumik nioqquteqarfinnit nioqquteqarnikkut, imaluunniit kalaaliminernik tuniniaavinnit il.il. nioqquteqarnikkut inuit inatsisitigullu pineqartut aamma nioqquteqarsinnaapput".

6. § 13-imi imm. 3-tut ilanngunneqassaaq:

"Imm. 3. Inatsimmi matumani aalajangersakkanit takornarianut sammititanit immikkut aaqqissuussinernut il.il. atatillugu Naalakkersuisut erseqqinnerusunik inuussutissarsiummik ingerlataqarnermik ilaatitsinninnissamut malittarisassaliorsinnaapput".

§ 2

Inatsisartut inatsisaat ulloq 1. april 2006 atuutilissaaq.

Namminersornerullutik Oqartussat, ulloq 27. marts 2006

Hans Enoksen

/

Siverth K. Heilmann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut